

四庫全書

史部

欽定四庫全書

史部

欽定大清會典則例卷三十八

詳校官檢討臣劉炘

編修臣程嘉謨覆勘

總校官原任中允臣王燕緒

校對官典簿臣劉景岳

謄錄監生臣陳廷棟

欽定四庫全書

欽定大清會典則例卷三十八

戶部

權量

一尺秤順治十五年題準各關量船稱貨務使

秤尺乘足不得任意輕重長短○康熙元年題

準直省尺斗等秤均照部頒前式畫一遵行違

制者究處

一法馬順治十一年

諭徵收錢糧各督撫嚴飭有司務遵部頒較定法馬有
私自增加者不時稽察欽此○十七年覆準凡起解
錢糧令管解官面驗部頒法馬左右分兌以杜
私弊○雍正五年

諭部中所頒法馬輕重合宜各布政使司照所頒之式
較準製成法馬彈用仍令各屬畫一遵奉但銅質磨
輕異於原頒分兩者可咨部請領換給欽此○十一

年議準法馬由部審定輕重工部鑄造各布政使司遣官赴領本部司官同工部司官面加詳較將正副法馬封交赴領官齎回各布政使將部頒副法馬收貯行用正法馬如正法馬年久與副法馬輕重不符即用副法馬彈兌以正法馬送部換鑄虛捏不符者交部議處

部頒法馬由一分至

九分一錢至九錢一兩至十兩二十兩三十兩五十兩百兩二百兩三百兩五百兩正副各一副

○又議準各布政使司錢糧解部者將部頒

法馬封交解官齋部庫官將庫存原法馬較準
合一然後兌收如有短少將解官叅處勒追倘
將法馬私行改鑄者按律治罪或庫官故為輕
重任意勒索亦察明嚴叅○又議準各省布政
使將州縣鑄造正副法馬與部頒法馬較準呈
巡撫驗明發回州縣錢糧解司時將副法馬印
封齋司較對兌收如有故為輕重任意勒索者
即行題叅○又議準各處雜項銀均以市平交

納每千兩較平少三十六兩應照依庫平折算
兌收○十二年奏準八旗收發銀照戶部庫平
製造法馬分給其各佐領下亦照庫平設立準
等以發兵餉

一升斗斛順治五年定戶部較準斛式照式造
成發坐糧廳收糧○又定工部鑄鐵斛二張一
存戶部一發倉場侍郎再造木斛十二張頒發
各省○十二年題準較準倉斛容積之數鑄造

鐵斛存貯戶部備式頒發倉場侍郎漕運總督直省布政使司各一布政使照式轉發糧道各倉官較準收糧○康熙六年覆準徵收漕糧務遵順治十二年部頒鐵斛如年久口面凹損即請重鑄新斛頒發仍將舊斛送部如有參差互異苦累軍民者將經管官指叅解送舊斛遲延及破損遺失者議處○四十三年

諭朕見直隸各省民間所用等秤雖輕重稍殊尚不甚

相懸絕惟斗斛大小迥然各別不獨各省不同即一縣之內市城鄉村亦不相等此皆牙儉評價之人希圖牟利之所致也又升斗面寬底窄若稍尖量即致浮多若稍平量即致虧額弊端易生職此之故於民間甚屬未便嗣後直省斗斛大小作何畫一其升斗式樣可否底面一律平準以杜弊端至盛京金石金斗關東斗亦應一并畫一著九卿詹事科道詳議具奏欽此遵

旨議準直省府州縣市廛鎮店馬頭鄉村民人所用之斛均令照戶部原頒鐵斛之式其升斗亦照戶部倉斗倉升式樣底面一律平準

盛京金石金斗關東斗皆停其使用鑄造鐵斗三十鐵升三十發

盛京戶部順天府五城倉場直隸各省巡撫令轉發寧古塔黑龍江等處及各布政使司糧道府州縣倉官通行曉諭地方民人一例遵行○四

十五年覆準陝西徵收糧米支放兵餉均用永
豐倉斗較之部頒斗斛每石浮多三斗應令照
依舊斗之數以部斗收支停用舊斗○雍正八
年題準各糧道樣斛原與部頒鐵斛較準飭發
但用木板製造日久朽敝不無參差亦照布政
使司之例將部頒鐵斛頒發各糧道永遠遵行

○乾隆九年

皇上得東漢嘉量圓形較其度數中今太簇又考唐

張文收作嘉量方形乃仿其遺制用今律度

御製嘉量方圓各一範銅塗金掌之工部陳之

殿廷其上為斛其下為斗左耳為升右耳為合

其重二鈞聲中黃鐘之宮

親為之銘曰

皇子

聖祖建極憲天度律均鐘洞契元聲微顯闡幽何天衢
亨小子纘緒寰區撫臨協時月正日同律度量衡

製茲法器列于大廷匪作伊述

大猷敬承遵鐘得度率度量成量為權輿律諧六英
猗

聖合

天

天心

聖明七政是齊為萬世法程如衡無私如權不凝如度
制節如量祇平律得環中紹

天明命永寶用享子孫繩繩我日斯邁而月斯征中元

甲子乾隆御銘

庫藏

國初設立戶部三庫一曰銀庫

在部署

一曰段疋庫

在東華門外

一曰顏料庫

在西安門內

一總理庫務順治初年統歸戶部管理後分屬

各部寺收支兼設巡庫科道尋裁康熙三年仍

歸部管理○雍正元年

特命王公大臣總理三庫鑄給印信○八年奏準更鑄

管理戶部三庫衙門印信

一管庫官從順治初年題準設後庫滿郎中四
人員外郎二人司庫六人筆帖式十人○十二
年定分為銀庫段疋庫顏料庫三庫設理事官
二人掌庫印增設司庫三人筆帖式二人○康
熙二十五年定將管庫官分隸三庫各按所司
掌稽出納滿洲掌印郎中每庫各一人員外郎
每庫各一人司庫每庫各二人筆帖式每庫各
八人庫使銀庫十有二人段疋庫顏料庫各十

人經制書吏每庫各一人顏料庫內監六人樓
軍八人匠役四十二人銀庫匠役三人○雍正
二年設大使每庫各一人增設員外郎每庫各
一人銀庫銀匠三人皂役三人庫丁四十人段
疋庫庫役二十一人顏料庫樓軍二十八人顏
料庫庫使一人大使書吏每庫各一人皂隸每
庫各二人裁銀庫司庫一人筆帖式二人庫使
六人段疋庫筆帖式五人庫使一人顏料庫筆

帖式四人匠役一人內監六人設三庫掌案主
事一人筆帖式二人書吏二人皂隸四人○乾
隆三年奏準增銀庫大使一人經制書吏二人
○十三年奏準看守三庫官兵銀庫旗員五人
兵十人段疋庫旗員四人兵五十人顏料庫旗
員八人兵四十二人均令上三旗選委賢員遇
換班之日前往稽察仍令所委稽察官在庫投
遞職名以備注冊如有空班不到該旗立即題

叅倘稽察官徇隱姑縱經庫官察出除將守庫
官叅處外並稽察官亦交部議處

一選補庫官康熙四十四年

諭銀庫段足庫顏料庫郎中員外郎向繫將本部官斟
酌選補嗣後將各部院官員保舉引見欽此○乾隆
三年奏準三庫郎中員外郎在庫行走三年滿
後於各部院衙門滿郎中員外郎內遴選保送

引

見調補司庫五年一更期滿以應升主事即用司庫
員闕於三庫筆帖式庫使內遴選題補○又題
準增銀庫大使一人於三庫筆帖式內遴選題
補五年期滿照例以應升之官即用○九年奏
準三庫掌案主事並三庫司庫大使筆帖式庫
使均三年更代主事年滿於部院滿主事內遴
選保送引

見調補司庫年滿於各部院滿正七品從七品小京

官內遴選保送引

見調補庫大使年滿於各部院滿筆帖式內遴選保

送引

見調補各以原銜食俸停止五年期滿保題升用之

例掌案主事三庫筆帖式年滿於各部院滿筆

帖式內保送每員闕遴選二人保送引

見調補三庫庫使年滿於各部寺庫使內遴選保送

引

見調補

一銀庫乃天下財賦之總滙出納均有常經各省歲輸田賦鹽課關稅雜賦除存留本省支用外凡起運至京者咸入焉田賦由各州縣運赴布政使司由布政使司解部鹽課或場官經徵申解鹽運使司或鹽運使經徵均由鹽政委官解部關稅由各關監督按例徵課分季解部雜賦解部與田賦同直省贓罰銀彙解按察使司

除解刑部公用外餘亦解部均入庫收貯寶泉局鑄出制錢亦入庫收貯以待度支○順治初年定直省起解本色物料折色銀到部各該司察驗移文掌庫官照數兌驗收貯出給庫收付覆各司○十二年題準掌庫官司庫每歲終將出納銀錢造冊呈堂覈算○十六年題準直省起解錢糧徑投各部免赴京畿道挂號驗批○康熙十四年議準管庫官將庫內物件不行固

貯以致庫司等偷盜者降一級調用罰俸一年
○四十五年

諭凡庫內錢糧皆有交代所以易於盤察惟戶部銀庫貯銀甚多盤察甚難其出入數目必不能清楚著將每年新收銀別行收貯至用銀時將舊銀挨用則易於盤察而數目亦得清楚矣欽此○雍正二年題準各省將解送銀段顏料限定日期或差官某人或差役某人某項銀段顏料若干木鞘包箱若

干均用印封封固於某日起程幾日到部豫行
知會大使文到令大使呈報總理三庫大臣及
庫官俟銀物解到之日將批文登記號簿送承
發科即令該司司官公同監收呈報總理大臣
至劈鞘時令大使看劈如有補交短少銀者令
大使公同該司官到庫驗收將點鞘承辦之處
專責大使門官不得干與○八年覆準嗣後凡
解銀及顏料香木等項到部均限一月內驗收

給發批迴○十年奏準頒給各省正副法馬嗣後解銀將副法馬封交解官齎領至部與庫貯原法馬較準合一然後兌收如有短少將解官叅處倘有將法馬私行改鑄者察出叅奏按律治罪庫官故為輕重察實嚴叅○十二年奏準解部銀如有短少將原銀交解官看守行令兌發官親身赴京到部自看彈兌令其對證明確若無短少將庫官從重議處如果短少將兌發

官及解官分別議處所闕銀著落兌發官賠補
○又奏準嗣後地丁銀解交元寶關鈔鹽課漕
項悉解散碎銀以便給發○又議準外解贓罰
銀除原文投刑部外銀批徑投到部由部收足
後知會刑部覈案完結○又奏準八旗支領兵
餉務令叅領佐領驍騎校等赴庫眼同庫官彈
允收領領回親身散給以免扣剋○又奏準各
省元寶輕重不等令該督撫等轉飭州縣於傾

鎔時驗足成色允準分兩入鑪鎔鑄出鑄之後如輕重適符部頒法馬毋庸更加滴珠者文內聲明別鞘裝載如有輕短者毋庸回鑪重鑄亦毋庸更加滴珠但將應加滴珠之銀覈準數目另封入鞘戶部彈兌之時繫足數者如數驗收以備給發官軍俸餉其不足者即用所封滴珠之銀加平彈兌其元寶入於碎銀內給發○乾隆三年奏準兩淮鹽課均令傾成元寶解交

一段疋庫凡各省解到紬段絹布皮絲棉線麻等項均付庫收貯○順治初年定三處織造錢糧事宜均隸戶部○八年定改隸工部○康熙三年定織造事宜隸工部錢糧歸戶部報銷○又定江寧蘇州杭州三織造應解大蟒段小蟒段金線蟒段暗蟒段三等蟒段立蟒段大閃段小閃段粧花段寸蟒粧段次粧段中錦草錦金字段補段補服料羅段片金羅片金倭段帽段

次帽段滿水段裙蟒段蟒紗立蟒紗韃花紗裙
蟒紗紗片金金字紗補紗大段次大段亮花段
衣素段次衣素段各色光素段次光素段揚段
次揚段彭段次彭段宮綉各種紗羅紡絲綾西
絹杭綉三梭布三線布油墩布苧布白苧布夏
布絲緯絲絨繡線絹線生絲手帕以上各項如
庫中應需某項酌量均派於豫年八月內具稟
呈堂移付江浙二司轉行各該織造辦解定限

於次年八月內解部如派後再有闕少不敷者

隨即加派酌量限期辦解其價直均由各該司

覈銷○山西布政使司應解生絹千二百疋農

桑絲絹二百疋遇閏加四十四疋三梭棉布二

千四百九十八疋丈八尺有奇

舊繫江蘇辦解
雍正三年改歸

山西○江蘇布政使司應解五色三梭布五千疋

○浙江布政使司應解白綿二百斤

以上採辦
價直皆由

部覈銷○舊解今停者直隸山東花絨河南衣
絨山東河南濶棉布江蘇黃白絹黃絲絹白麻

安徽孤皮稅絲絹土絹江蘇安徽生絹農桑絹
棉布麻安徽江西苧布浙江杭細白絲黃絲價

銀扣存布政使司庫按數解部 ○順治十六年覆準解到絲綿

絹疋等項已經委司選驗堪用者該庫不許覆

驗耽延抑勒多收違者治罪 ○康熙五十年奉

旨嗣後如用采紬著內務府出給印文委官到部取用

事完仍令原取之官親身赴部繳明 ○五十八年覆

準段疋庫照銀庫例動支舊存物料將新收者

別行收貯 ○雍正七年奏準江寧織辦段紗照

杭州之例每年於藩庫見存銀內先支二萬兩
辦理餘銀俟派文到日找給○又奏準

上用御衣水運原用二船嗣後裁去一船

上用段疋仍歸陸運自雇羸脚○乾隆十年奏準嗣
後三處織造採買

上用絲每兩經絲準銷銀八分二釐緯絲準銷銀七
分七釐絨絨絲準銷銀七分五釐均於浙江之
南潯雙林二處置買官用絲每兩經絲準銷銀

八分一釐五毫緯絲準銷銀七分五釐
糙絨絲準銷銀七分四釐均於新市置買其價由織造
官先呈報督撫取具地方官並無浮冒印結再
報明本部內務府價賤時照定價置買價貴時
準其加增但所增價直

上用絲不得出二分一釐之數官用絲不得出一分
二釐之數杭州紬綾絲皆重至奏銷時將逐疋
所用經絲緯絲若干織成段疋重若干應銷若

干逐一分晰造冊送部覈銷所織段如絲不純
不淨及分兩輕減者內務府駁回令織造官補
織解送○又議準三處織造所用

上用紅圓金每丈準銷銀三釐扁金每十條準銷銀
二釐蘇杭二處黃圓金每丈準銷銀三釐江寧
青圓金每十有四丈準銷銀三分江寧濶扁金
每五百二十條準銷銀一錢四釐雙料紅圓金
每丈準銷銀三釐杭州淡圓金每十有一丈二

尺準銷銀三分四釐紫赤圓金每十有一丈二
尺準銷銀三分六釐大赤扁金每六百條準銷
銀一錢三處官用紅圓金每丈準銷銀二釐五
毫赤扁金每十條準銷銀一釐五毫杭州紫扁
金每六百條準銷銀九分染價江寧大紅色每
絲一兩作價銀一錢二分二紅三紅色作價銀
一分三釐蘇杭二處顏色精佳大紅色每絲一
兩作價銀一錢五分二紅三紅色作價銀一分

五釐各色染價蘇州染匠向無食米每絲一兩
支工價銀自一分至二分不等江寧杭州二處
向繫四五釐至八九釐者仍照舊例均準開銷
一分至刷紗經仍照舊例開銷搥紡工價江寧
杭州二處

上用經絲每兩準銷銀二分緯絨絲每兩準銷銀一
分官用經絲每兩準銷銀一分八釐緯絨絲每
兩準銷銀九釐杭州掉絡刷紗每兩準銷銀一

分至蘇州無搠紡額設支米工匠遇工雇募

上用經絲每兩準銷銀四分官用經絲每兩準銷銀

二分其緯絨絲不分

上用官用每兩均準銷銀一分六釐再牽經接經工

價三處織造每疋槩給工價銀八分其打線工

價每工自四釐至九釐一分不等織挽各匠每

名日給工銀五分月給食米四斗○又奏準三

處織造一例織辦所需工價數目自應相同何

至彼此多寡懸殊嗣後除多至四五工準其開
銷外其多至五工以上者即令覈減○又奏準
江寧見設機六百張機匠千七百八十名蘇州
見設機六百六十三張機匠千九百三十二名
杭州見設機六百張機匠千八百名外江寧見
畱搖紡染匠所管高手等匠七百七十七名蘇
州挑花棟繡所管高手等匠二百四十三名杭
州搖紡染匠挑花及所管高手等匠五百三十

闕人役按季報部再江杭二處各色染匠江寧
大紅染匠既經裁去食米其工價量加增給酌
定江寧大紅每絲一兩準銷銀一錢三分江杭
二處各色染價向日四五釐者作為六釐向日
八九釐者作為一分其一分以上者作為一分
五釐開銷○十二年議準三處織造繫委官買
絲嗣後無庸支給盤費杭州與產絲地接壤毋
庸給與運費外其江寧蘇州運絲船價車脚人

役盤費等項按照程塗酌定數目於申餘項下
開銷每歲呈報內務府察覈○又奏準江寧染
匠遵奉裁減外搠紡匠五百二十六名皆自幼
在局習成與民間外戶各別難以臨時募補仍
按舊例以在局學成之幼匠補充斥革病故之
原數照舊按名月給食米三斗○又奏準部派
段紗工料價直自宜與內務府派辦段紗一例
辦理令織造官均照新定條款題銷緯絨等絲

按照經絲加增之數每兩酌減五釐價貴之年
上用緯絨絲每兩準其加增一分六釐官用緯絨絲
每兩準其加增七釐如遇價賤年分即照原定
價直採買仍令浙撫飭產絲地方官確訪時價
取具並無捏飾印結咨部存案竝織造官報銷
到日覈對相符方準開銷如有參差浮冒即行
嚴叅議處○二十年覆準江寧蘇州杭州三處
織造買絲定例

上用經絲每兩價銀不得過一錢三釐緯絲每兩不得過九分三釐官用經絲每兩不得過九分三釐五毫緯絲每兩不得過八分二釐如有不敷通融辦理今浙省春雨連綿天寒葉濕蠶多損傷收成歉薄以致

上用絲每兩實需銀一錢三分有奇官用絲每兩實需銀一錢二分有奇實不能通融辦理準其照產絲地方價直分別經緯據實報銷

一顏料庫凡各省解到銅鐵鉛錫硃砂黃丹沉香降香黃茶白蠟黃蠟紙桐油並花梨紫榆等木均付庫收貯又專辦成造香燭以供祭祀以備內用○直隸布政使司應解黃櫨木二千四百三十斤芝麻百石○山東布政使司應解黃丹五千斤○山西布政使司應解平鐵七萬斤

舊繫江蘇解解雍正三年改歸山西

毛頭紙四十萬張呈文紙萬

張○河南布政使司應解黑鉛七萬六百八十

三斤○江蘇布政使司應解烏梅千斤明礬六

千斤○安徽布政使司應解紅熟銅九千六百

二十五斤有奇鋼萬有六百六十一斤桐油萬

三千二十六斤

舊解萬三千五百四十三斤雍正三年以福建原辦之四百八

十三斤改歸安徽

銀硃五千八百十有一斤有奇○江

西布政使司應解銀硃二千五百八十九斤有

奇桐油二千五百四十一斤

舊解二千五百八十八斤雍正三年以福

建原解之四百八十三斤改歸江西

紫草一百六十二斤有奇五

梔子二百九十七斤有奇○福建布政使司應

解紅熟銅八千六百有八斤有奇

舊解四十六百二十二斤

雍正二年以河南江西原解之三

千九百八十六斤有奇改歸福建黑鉛十萬五

千百五十七斤有奇沉速香六百斤○浙江布

政使司應解黃熟銅千六十五斤桐油八千三

百二十九斤有奇芽茶五千斤黃茶九十二簍

計九千二百斤○湖北布政使司應解黑鉛萬

七千六百六十九斤○湖南布政使司應解黑

鉛萬七千六百六十九斤○廣東布政使司應

解紫降香九百斤沉香三百斤紫榆木十四段

每段重二百斤花梨木十四段每段重百五十

斤廣膠千斤廣靛花二千斤○雲南布政使司

應解天青二百三十斤有奇大青次天青六十六

斤有奇二青○以上應解各物如庫貯足用則

停解不足用則行取屢年增減無定數

○舊解今停者直隸蒲杖山東紅花槐花河南
芝麻花粉白芨安徽榜紙鐙草福建紫降香湖
南硃砂廣東鋼直隸山東河南安徽湖北湖南
牛角弓面牛角山東河南山西福建廣西生熟

銅山東河南牛筋山東山西水膠山東河南安
徽江西福建浙江湖北湖南廣東黃蠟山西西
安紫草山西河南江西明砮山西福建浙江五
梧子山西安徽福建廣東錫鐵江蘇安徽散花
青騰黃光粉江蘇安徽福建芽茶江蘇安徽廣
東廣西魚線膠江蘇安徽江西福建浙江廣東
膩硃安徽福建黑鉛安徽江西福建浙江烏梅
安徽江西福建湖北湖南廣東白蠟福建廣東
銀硃福建浙江廣西熟鐵以上停
解價銀扣存布政司庫按數解部 ○順治初年

定直省起解本色物料守道布政使司差委廉
幹官填付勘合水陸撥夫限程扣送到京先將
批迴赴京畿道挂號方準投部部令各司察驗

收貯即判批迴給原解官回銷仍存案以備考
察○九年議準直省解交本色顏料藥材等項
酌議折銀起解○十年

諭民間辦解物料籤點解戶賠累難堪其應解本色官
收官解不得仍派小民欽此○十七年題準顏料等
項定限每歲八月交納○康熙七年題準各省
本色顏料本年四月領銀辦買限十月解部○
十一年題準顏料等項該撫委的當官役批內

注定到京月日赴崇文門掛號後限五日內交
納由部照批察驗逾限者將領解官叅處如已
到京不即交納或姦蠹包攬及崇文門役需索
抑勒者照侵欺例處分○二十五年奉

旨直隸山東河南停解本色狐皮準以折色解部在京
採買○二十六年覆準直省停解芝蔴花絨折色解
部竝庫內用完再行解送其梨木板片停其解
送竝需用時在京購買如尺寸不符再行交該

撫辦解○又覆準山東等省停解牛角白芨紫
草靛花均折價解部○二十七年覆準蜀道險
阻解送白蠟恐致累民著停其解送將採辦價
銀撥充兵餉○二十八年覆準廣東每年解送
本色顏料止委府佐二人分批彙解○又題準
各省所解顏料該督撫計路程遠近酌給水脚
以杜濫派○三十一年覆準豫省不產牛角將
增辦千五百副改令廣東太平關粵海關及揚

關每關辦解五百副揚關每年限十一月內到
部太平關粵海關限次年二月到部○三十三
年

諭各省解送各項物料內或有無用者亦有京師可以
辦買者令該部將應解送應停止款項確議具奏欽
此遵

旨議準各省解送黃櫨木等九十九項令照舊解送白
銅無應用之處將此項停解青粉等三十八項

外省價直并脚價合算比在京時價轉貴停其
外解如有應用之處在京照時價採買或遇時
價騰貴京中闕少由部具題再令出產省分解
送○三十八年議準各省辦解物料均照賦役
全書開載辦解其辦買價直路費均動正項○
五十一年議準各省應解顏料等項如不堪應
用將監辦官照侵蝕入已例嚴加究處該撫照
不行遴委能員例議處其辦買價直即著落監

辦官及該撫分賠○五十八年覆準顏料庫照
銀庫例動支舊存物料將新收者別行收貯○
雍正三年奏準舊定各省解送物料有非本省
所出者皆停其解送改於出產省分或貨物聚
集之處令其解送直隸山東原解牛角弓面停
其解送竝庫存牛角將用完時改令出產之江
南湖北湖南三省分解陝西所解紫草暫停解
送竝庫內所存將用完時令其起解山西增解

之毛頭紙百有五萬張停其解送每年但將原
解十有五萬張解送數年之後酌量足用再停
額解

一

盛京戶部銀庫收貯金銀幣帛顏料等物供用

三陵祭祀及東三省

盛京吉林黑龍江

官兵俸餉各項賞賜之

用每歲

盛京戶部豫疏請撥由部劄庫發給委官運往貯

庫按期分發次年入奏冊覈銷

庫設掌關防郎中一人員外郎

一人司庫一人

一

盛京將軍庫吉林將軍庫寧古塔副都統庫白都

訥副都統庫三姓副都統庫拉林副都統庫齊

齊哈爾將軍庫黑龍江副都統庫默爾根副都

統庫湖蘭城守尉庫各貯該處官兵俸餉及雜

稅官莊糶賣糧價按年造冊申報察覈

無額設庫官

一直省藩庫乃一省財賦之總滙各州縣歲徵

田賦雜賦除存留支用外餘悉起解布政使司

貯庫庫設大使一人間設副庫使一人司啓閉

掌平衡布政使司稽收支出納之數彙冊申巡

撫達部察覈

直隸山東山西河南江蘇安徽江西福建湖北湖南陝西甘肅四川

廣東廣西貴州各布政使司庫設大使一人浙

江雲南布政使司庫各設大使一人副庫使一人

一按察使司庫專貯贓罰銀錢按例報解刑部

公用外餘解部庫

無額設庫
官各省同

一糧儲道庫督糧道庫專貯漕項銀凡漕項編

入地徵者州縣隨地賦徵解布政使司布政使

按數移解糧道在本省則收貯道庫運糧抵通

則解納通州戶部分司

即坐
糧廳

庫設大使一人糧

道掌稽出納造冊申漕運總督咨部考覈

山東
河南

江蘇安徽江西浙江湖北湖南各糧道庫設
大使一人戶部分司通濟庫設大使一人

一驛道庫專貯驛站夫馬工料河道庫專貯河

餉兵備道庫專貯兵餉或由布政使司照數移
解或由部撥鄰省運往貯用各道專稽出納造
冊申督撫河道總督分咨兵工二部及本部察

覈

無額設庫
官各省同

一鹽運使司庫鹽法道庫專貯正雜鹽課凡場
大使之徵解商人按引之輸納悉入焉庫設大
使一人鹽運使司鹽法道專稽出納造冊申鹽

政管鹽督撫咨部考覈

長蘆天津山東河東兩
淮廣東各鹽運使司庫

福建兩浙四川廣西雲南各
鹽法道庫均設大使一人

一各稅務由部差者有監督庫專貯關鈔按例

分四季解部如繫道府廳州縣等官經管者則

貯經理之該員庫內年終報解部庫察收

無額設庫

官各省同

一地居衝要之分巡道庫府庫直隸州庫及分

駐苗疆之同知通判庫均按地方大小距省遠

近酌撥司庫銀分貯各庫以備急需每歲布政

使司入春秋季報冊咨部察覈

無額設庫
官各省同

一州縣衛所庫收貯本色正雜賦銀存留者照數坐支起運者徵解布政使司庫按催徵限期造具完欠數目冊隨時申報司撫入奏銷考成

無額設庫
官各省同

一盤察康熙十五年題準各省布政使司管糧守道或有升降將一應經收經放並實在錢糧令其逐一造具清冊交代至所造交代文冊若

布政使司升任本省巡撫者令本省總督確察具題如無總督省分該撫不便自行具題令新任布政使司覈明具題如升調別任並降革事故離任者均令本省巡撫確察具題其交代錢糧有侵欺透冒那移墊解等弊均照例處分至督撫不行覈明朦溷徇庇具題者事發將督撫一并嚴加議處○二十四年議準各省藩司遇升任或降調交代時必將其任內收放錢糧令

督撫親身確察如有侵那虧欠者即行題叅如無虧欠即具並無侵那甘結送部察覈○二十年議準各省藩司交代之時雖令督撫親身盤察具結送部但未有逐歲盤察之例嗣後令各巡撫於每年奏銷時將司庫錢糧親身盤察如無虧空於奏銷本內保題倘仍有虧空將巡撫照例治罪○五十年議準各省鹽運司庫貯鹽課責任與藩司相同嗣後運使交代亦照藩

司交代之例將舊官任內收放錢糧新官交盤
出結造具四柱清冊呈詳巡鹽御史具題分送
部科稽察如有徇隱情弊察出一并議處追賠
○雍正八年議準各省驛道升轉離任時交代
錢糧令造具四柱款冊該督撫具題報部察覈
○十一年議準各省糧驛二道庫貯錢糧向於
奏銷時責成藩司盤察出結保送未將出入數
目隨時移會藩司覈對嗣後凡有收支款項數

目均令隨時知會藩司存案每年奏銷時仍將
本年出入款項支存確數及各年各款支存銀
數備細造冊移司該布政使逐款覈對出具盤
察清楚印結送部察覈其每年奏銷奉部題覆
之後該督撫仍行知該布政使司存案覈對○
又議準各省驛道庫貯錢糧交代時既繫造冊
具題糧道乃各省漕項錢糧筭鑰其新舊交代
自應一例題報嗣後各省糧道如有升轉離任

新舊交代將任內經手錢糧亦造具細款四柱
清冊具題送部察覈○乾隆四年議準各省鹽
道庫止貯正雜鹽課向無盤察之例通行管鹽
督撫鹽政將道庫鹽課錢糧於每年奏銷時親
臨盤察虧則題叅足則出結題報如有隱匿扶
同等弊一經發覺照例叅處○五年題準直隸
霸昌口北二道庫有豫備軍需銀天津通永大
名三道庫歲有搶修及豫備要工銀均應不時

盤察嗣後各道庫內有原貯河工錢糧例應河督盤察者將分貯兵餉並令河督就便盤察結報其餘道庫令藩司委官盤察結報

盤察府州縣例詳見

田賦

一畱貯雍正五年議準各省布政使司庫貯錢糧悉令造入春秋二季報冊候撥至冬季大撥時又將各省應存及次年額徵悉行撥充兵餉司庫幾無餘剩倘有急需鞭長莫及應按地方

之遠近存剩之多寡酌留數十萬兩令該督撫
公同封貯藩庫如有動用之處題明動用除直
隸近京無庸留貯外山東藩庫留貯十萬兩山
西河南湖北陝西廣東各二十萬兩江蘇安徽
江西福建浙江湖南甘肅四川廣西雲南貴州
各三十萬兩封貯備用每年入季冊報部察覈
一分貯雍正八年

諭向來大宛二縣常有速辦之公事不得不那庫銀以

濟用而上司察知每以虧空題叅至於罷黜治罪實為可憫用沛特恩於大宛二縣各發帑銀萬兩存貯該縣倘遇有速辦之公事準其詳明府尹動支近思辦理軍需之州縣其急切應付之處刻不容緩而該州縣並無存貯備用之項朕意欲於辦理軍需及事務繁劇之州縣亦仿大宛之例酌畱帑銀以備急切之用其如何舉行俾辦公有賴而弊實不生著大學士等悉心定議具奏欽此遵

旨議準按省分之大小直隸山東山西河南各存留十
有五萬兩江蘇安徽江西各十萬兩福建二十
萬兩浙江湖北湖南各十萬兩西安甘肅四川
各三十萬兩廣東十萬兩廣西十有五萬兩雲
南貴州各二十萬兩均分貯府庫直隸州庫如
有急切公務具文請領該府州立即給發該州
縣辦理之後據實開報該府州轉申布政使督
撫覈實歲終造冊咨部察覈○乾隆五年議準

各省分貯急需銀有因軍需動用者亦有始終
未經動用者若不隨時酌宜或久貯不加察覈
恐日後漸啓侵虧於急切需用時轉多貽誤令
該督撫酌量地方情形是否仍應分貯抑或歸
并司庫酌留項下備用妥議報部○又覆準直
省分貯府州庫內急需銀經各該督撫就地方
情形定議咨部直隸原分貯銀十五萬兩仍分
貯道府庫十一萬兩餘四萬兩提回司庫候撥

山東原分貯十五萬兩均歸入司庫酌留項下
封貯山西原分貯十五萬兩仍分貯各府四萬
兩餘十一萬兩提回司庫河南原分貯十五萬
兩仍分貯府州二萬兩餘十三萬兩歸入司庫
江蘇原分貯十萬兩仍分貯府庫二萬兩道庫
運司庫六萬兩餘二萬兩歸入司庫安徽原分
貯十萬兩仍分貯府庫五萬兩餘五萬兩歸入
司庫江西原分貯十萬兩仍分貯府庫三萬兩

餘七萬兩歸入司庫福建原分貯二十萬兩浙
江湖南廣東原分貯十萬兩均仍分貯各府州
庫湖北原分貯十萬兩仍分貯府州庫五萬兩
餘五萬兩歸入司庫陝西原分貯三十萬兩仍
分貯府州庫十萬兩餘二十萬兩歸入司庫甘
肅原分貯三十萬兩仍令分貯府州庫二十二
萬兩餘八萬兩歸入司庫四川原分貯三十萬
兩仍分貯府州庫敘永松潘二同知庫二十萬

七十兩餘九萬三千兩歸入司庫廣西原分貯
十五萬兩仍分貯府庫六萬六千兩餘八萬四
千兩歸入司庫雲南原分貯二十萬兩仍分貯
各府庫萬八千兩餘十有八萬二千兩歸入司
庫貴州原分貯二十萬兩仍分貯道府庫台拱
八寨同知庫都江丹江清江通判庫三萬六千
兩餘十有六萬四千兩歸入司庫各開造酌留

項下封貯備用

每年入季冊
報部察覈

一寄貯雍正十年覆準各省沿邊營汛去省寫
遠兵丁得餉甚遲且逐季赴藩庫請領更多盤
纏運脚之費若兩季兼領餉一到營全數給發
又恐兵丁任意花費請將官兵所領兩季餉銀
寄貯同城文官庫內武弁撥兵看守按月給發
於兵丁有益但各省支放不同營制不一令各
督撫各據該省情形詳悉議定直隸貴州二省
仍按季支給山東河南二省分撥附近州縣按

月支給其山西之潞安澤州大同等營江南之
潛山徽州等營及河標各營江西之吉安等營
福建之臺澎南澳延平建寧等營浙江之象協
各營湖廣之穀城彝陵等營陝西之固原等營
四川之松潘等營廣東之瓊州一鎮及水師營
廣西之永寧等營雲南之昭通永北永順各鎮
營均離省遙遠所需兵餉準赴藩庫總領兩季
領回之日寄貯同城府州縣庫仍照例按季按

月散給



欽定大清會典則例卷三十八

欽定四庫全書

史部

欽定大清會典則例卷三十九

詳校官檢討臣劉焄

編修臣程嘉謨覆勘

總校官原任中允臣王燕緒

校對官助教臣黃昌禔

謄錄監生臣胡觀瀾

欽定四庫全書

欽定大清會典則例卷三十九

戶部

倉庾

一

京師十有三倉祿米倉五十七廩南新倉七十六
廩舊太倉八十九廩富新倉六十四廩興平倉
八十一廩均在朝陽門內海運倉百廩北新倉

八十五廩在東直門內太平倉八十六廩在朝

陽門外

均初建

國本裕倉三十廩在德勝門外清

河

康熙四十五年建

萬安倉九十三廩在朝陽門外

雍正

元年建

儲濟倉百有八廩裕豐倉六十三廩在東

便門外

雍正六年建

豐益倉三十廩在德勝門外安

河橋

雍正七年建

大通橋號房四十八間朝陽門號

房五十八間

舊設大通橋號房六十四間朝陽門號房二十八間雍正五年朝陽

門增建十四間又移大通橋河東十六間於朝陽門

通州二倉西倉二百廩在新城中倉一百十有

九廩在舊城南門內

均國初建舊有南倉八十一廩乾隆十八年奏裁

○通州石壩號房百有六間

舊設六十八間被燬十二間雍正五

年動支通濟庫銀增建五十間

土壩號房二十五間舊城南門

外號房十間新城南門外號房二十五間○康

熙五十四年覆準凡修造倉廩照一應修建例

三年內如有坍塌滲漏木料損壞著落原監造

官賠修○雍正三年奏準通倉向有席片鋪墊

例無板木京倉以板木鋪墊十年一換應將京倉木板展限至十六年一換所餘木板鋪墊通倉○四年題準京倉舊例每廩用松板五十塊楞木五根給鋸板工價銀八兩四錢嗣後每廩滿鋪用松板百有十塊並將松板鋸一為四以代楞木應用松板五十二塊鋸板工價每廩準給銀十二兩九錢三分七釐○十二年覆準建造京倉看倉旗員兵丁等房鋪共四十一處定

限三年保固並令倉場侍郎隨時察驗修補各
倉置造木斛每張例給工料價直銀七錢限三
年一造○乾隆六年奏準各倉廩鋪墊板木定
例十六年一換今皆屬堅固整齊毋庸拘定十
六年之限統竝每季放空之後察有朽壞者動
用每年所收板木隨時修理每廩抽換數片至
數十片不等其工價照滿鋪之例覈算於輕齎
項內給發○又奏準倉中竹席板木向繫收貯

各倉空厰今積貯充實並無空厰收貯應於倉
厰相間之處依兩邊厰牆下用柱脚上加櫛椽
蓋瓦前檐砌牆後檐用牖板每倉修蓋三五處
以資收貯○七年奏準各倉厰上設氣樓牕榻
每致鳥雀出入傷耗糧米嗣後均用竹篾編成
隔孔釘於牕牖之上○又奏準

京城內外各倉有安設博縫者惟富新等倉向未
安設照式加增○八年奏準各倉厰抽換板片

例應工部委官察驗覈銷每因新糧到通需廩貯米不及候驗嗣後抽換廩板新糧未到之先及糧務完竣之後仍咨工部委官察驗如遇新糧到通之時由倉場侍郎委官就近察驗咨部覈銷

一總督倉場戶部右侍郎順治十五年定滿漢各一人駐劄通州新城總理京通各倉糧務其漕運總督各該督撫及沿河文武衙門凡漕運

文冊應報倉場者均照報部體式應舉劾者照例舉劾各項應行事宜倉場造冊報部察覈○

又覆準每年春間出巡閱看牯河點驗石土兩壩經紀車戶駁船督令坐糧廳催置布袋以備新糧到壩起運○又覆準漕白糧船抵天津督率沿河文武官弁往來催運並察驗北河淺阻令坐糧廳督夫疏濬深通毋致糧艘阻滯○又議準重運糧船到通督令坐糧廳起卸過壩騰

空漕船頒給限單催令回空○又覆準各倉收糧完竣分晰各幫完欠數目造冊具題交部察覈○又覆準輕齋由牘等銀倉場侍郎督催各省糧道按年越漕先解歲終將收放銀數造冊題銷各省未經解完者將巡撫糧道題叅仍催補解○康熙二年題準倉場督收各省漕糧除帶運米不算外其扣收餘米抵欠算入正運數內總作十分考覈未完五釐以上至一分者罰

俸一年三年連欠五釐以上至一分者降一級
督催○雍正三年覆準漕白糧船抵通日期及
起過糧數回空船數並石壩外河水勢深淺五
日一次具奏○七年題準漕白二糧及通濟庫
錢糧奏銷向未定有限期酌定於次年五月內
造冊具題

一坐糧廳滿漢各一人管理北河濬淺修築隄
岸壩壩催趲漕船抵壩回空督令經紀車戶轉

運交倉兼管通濟庫銀出納及抽收通州稅課
事務由各部院簡選賢能科道司官送部引

見差委二年更代所屬通濟庫大使一人通流慶豐

插官各一人經管石壩軍糧經紀百名白糧經

紀二十五名土壩車戶二十名

舊設五十名康熙二十五年裁

二十五年雍正十二年又裁五名

普濟插平下插軍糧水脚各

二十六名平上插慶豐插各十有三名白糧水

脚每插二名

舊設石上二壩外河船戶三十五名康熙二十九年裁并白糧經紀

土壩車戶又有石壩裏河水脚二十六名雍正五年裁歸漕糧經紀各役十年踐

更由通州知州選殷實良民承充不許旗人充
役並不許父子兄弟同充○康熙二年題準坐
糧廳經營漕糧除帶運米不算外其扣收餘米
抵欠算入正運數內總作十分考覈未完六釐
以上不及一分者罰俸六月一分以上不及二
分者罰俸一年

一大通橋監督滿漢各一人管理石壩運到漕

白二糧抽驗斛面督催車戶分運京倉兼收隨

糧松板經管軍糧車戶三十二名水脚十有三

名舊設軍糧車戶二十八名白糧車戶十三名水脚二名雍正十年裁白糧車戶水脚增軍

糧車戶四名歸并著役

一各倉監督除豐益倉由內務府委官管理外

在京十二倉通州二倉每倉設滿漢監督各一

人管理漕白二糧交納上倉及收貯支放等事

○祿米倉看倉旗員五人兵七十名經制吏二

名攢典二名皂隸五名花戶二十九名小甲二
名○南新倉看倉旗員四人兵四十名經制吏
二名攢典二名皂隸四名鋪軍三名花戶二十
六名小甲二名○舊太倉看倉旗員六人兵四
十名經制吏二名攢典二名皂隸六名鋪軍二
名花戶二十四名小甲二名○海運倉看倉旗
員二人兵四十名經制吏二名攢典二名皂隸
六名鋪軍二名花戶二十五名小甲二名○北

新倉看倉旗員二人兵四十名經制吏二名攢
典二名皂隸六名舖軍二名花戶二十六名小
甲二名○富新倉看倉旗員四人兵四十名經
制吏二名攢典二名皂隸七名舖軍二名花戶
十有八名小甲二名○興平倉看倉旗員四人
兵四十名經制吏二名攢典二名皂隸六名舖
軍二名花戶二十四名小甲二名○太平倉看
倉旗員四人兵四十九名經制吏二名攢典二

名皂隸四名花戶二十八名小甲二名○萬安
倉看倉旗員四人兵三十九名經制吏二名攢
典二名皂隸六名花戶二十四名小甲四名○
本裕倉看倉旗員四人兵六十名經制吏二名
攢典二名皂隸四名舖軍花戶小甲均以在京
八倉各役輪流承直○裕豐倉看倉旗員二人
兵四十名經制吏二名攢典二名皂隸六名舖
軍二名花戶二十四名小甲二名○儲濟倉看

倉旗員四人兵七十名經制吏二名攢典二名
皂隸六名舖軍二名花戶三十名小甲二名○
豐盈倉監督繫內務府委官管理書攢四名貼
寫二名皂隸四名舖軍二名花戶二十六名小
甲二名看白二名○通州西倉看倉旗員二人
兵百名經制吏三名攢典三名舖軍二名花戶
十有八名甲斗二十四名舍人十有八名○中
倉看倉旗員二人兵七十名經制吏二名攢典

五名舍人九名舖軍一名花戶九名甲斗十有二名○順治元年定通倉監督一年更代○十八年定兩翼滿漢監督一年更代○康熙三年題準京通各倉監督二年更代○六年議準各倉均令三年更代○乾隆元年覆準大通橋及京通各倉滿漢監督向繁任滿之時行各部院保送引

見補授未免有需時日恐致貽誤倉務嗣後豫行內

閣簡送滿漢官各二人吏禮兵工四部大理寺
滿漢官各一人戶刑二部滿官各二人漢官各
三人宗人府理藩院國子監太常寺太僕寺鴻
臚寺滿官各一人光祿寺滿漢官各一人中書
科漢官一人送部引

見候

旨記名注册遇有員闕掣籤補授○又覆準大通橋
監督員闕令倉場總督於各倉監督內簡選引

見調補○又覆準京通各倉監督任滿之期向例一
年二年三年不等嗣後均以二年為滿滿漢一
年一人更代如二年內有俸滿應升者照常升
轉仍竢差滿更代○又覆準各倉監督差滿向
例按贏餘米多寡議叙應行停止如二年之內
出入公平糧儲無虧倉廩不致滲漏米色不致
霉變任滿時倉場侍郎即保題議敘加級如有
虧空題叅議處○又覆準京通各倉額設滿漢

監督各一人每逢收支糧米之時不能兼事稽
察嗣後收支之時由倉場移咨戶部於記名候
補監督人員內撥赴倉場分委各倉監看並不
時檄委收支事竣仍回本衙門辦事○四年議
準各倉花戶經管啓閉倉廩收支糧米出入量
兌非誠實良民充役難免需索竊盜之虞且恐
積年占據習久弊生應限五年役滿別擇土著
良民充補取具里鄰甘結及聯名互結報倉場

咨部存案○十七年奏準各倉監督二年一換
未免太促應改為三年更代

一內倉監督本部滿司官二人司其出納之事
每年糧船到通由總督倉場侍郎撥運漕白二
糧進倉又直隸布政使司歲解芝麻屯豆由部
交倉供支內務府太常寺光祿寺理藩院會同
四譯館白糧欽天監太醫院宗學旗學內監等
杭米並內務府油房芝麻賓館牧馬黑豆專隸

本部不屬倉場設經制吏一名皂隸四名斗級
十名○順治初年定專委本部廣西司滿漢司
官經管○康熙三十二年題準在於應除小差
之滿洲蒙古漢軍年久司官內挨次除用一人
管理任滿照京通各倉之例新舊交代考覈○
雍正元年奉

旨內倉監督於戶部滿司官內委用二人○十一年覆
準內倉滿監督二人向繫二年更代若一時並

更接任之人恐未諳練嗣後內倉監督錯綜更
代以慎倉儲

一稽察倉儲雍正五年

諭在京各倉每倉或都統或副都統各一人御史中不
論滿漢每倉各委一人專任稽察之責其支放奏銷
等事不必經管惟倉房滲漏牆垣損壞與倉內鋪墊
及匪類盜竊各弊察出即行文倉場侍郎知之若倉
場侍郎等遲延不及時辦理妥協即據實奏聞倘不

能察出弊端以致虧損倉糧著落稽察之都統副都
統御史與倉場監督等官分賠其通州三倉即照此
例交與通永道通州副將稽察其失察分賠之例亦
與京倉同欽此○五年覆準各倉積弊每於收米發
米之時胥役串通家人少進多出監督失於覺
察漸成虧空嗣後如虧空發覺將胥役照侵盜
錢糧例比監督減一等治罪其虧空之米著落
監督賠六分書攢賠二分頭役花戶合賠二分

照例勒限一年全完限內不完著地方官將家
產變賠○十二年奉

旨巡倉都統御史定為三年一次更代○乾隆元年奏
準向例各倉監督三年差滿題請

欽點王公大臣會同倉場逐廩察驗今監督差滿定
以二年錯綜更代若陸續奏請察驗不免紛繁
應限以四年奏請察驗一次○三年奏準各倉
存貯糧米向例以算法二五覈算每多錯誤嗣

後以積方之法酌定二年以內見方一尺照三
斗一升六合之法三年以外者每見方一尺照
三斗四升之法其二年以外三年以內者每見
方一尺照三斗二升八合之法丈算鑄造鐵尺
分交戶部倉場並各倉嗣後均照此尺丈量折
算如違叅究○十六年奏準新漕進倉若廩門
全不上板直至深秋始行封閉恐生弊端應令
收一廩即封一廩如恐米質蒸變應於廩門上

檐空出殿板四五尺宣通蒸氣以下所上殿板
即行加封以防弊端統竢深秋風高物燥之時
即全行上板封閉嚴密至收貯封閉日期仍令
各倉呈報稽察之都統御史察覈○十七年

諭巡視通州漕務向例止差科道一人專司催督漕
運而倉場事務則槩不與聞但通倉積弊甚多見
委大臣盤驗著增差科道四人前往巡視漕務凡
收兌新漕支發倉米皆著就近稽察至在京各倉

雖經委有專員亦著一同留心稽察務期諸弊肅清以副委任欽此○又奏準京倉向以都統一人御史一人專司稽察但都統因有旗務不能親身赴倉多繫委官代理御史間日一至亦不能每日赴倉稽察未為周密嗣後除都統直班御史在城理訟日期外酌量輪流到倉稽察如或踈畧令巡漕御史糾叅○又覆準京通各倉每倉差御史一人稽察年終更代將一年內並無

短收多發攬越廩座之弊據實奏明交部存案
如奏報不實別經察出將御史一并交部議處
其各倉收漕整廩倉場總督標封封固稽察御
史加封各廩鎖匙交倉場衙門收貯於點廩發
米時發倉啓廩封固之廩每於夏冬兩季驗看
一次重加封條新舊監督交代時整廩驗封零
廩抽盤如有攬雜短少即指定某廩攬雜某廩
短少揭報倉場總督及御史公同盤驗虧闕果

實治罪勒賠其監督新舊交代限兩月交完出
結出結之後經倉場總督及御史盤出虧闕即
將新監督指名叅處○十八年覆準各倉鑰匙
向繫監督收存遇有察驗之處呈請給發封條
繼因籌辦稽察倉場事務議令鑰匙交倉場總
督收執於點厰放米時發倉支放每於夏冬二
季驗看一次重加新封但未明定章程難以遵
守嗣後新漕進倉每年四五六七八月間將各

嚴鑰匙暫給監督收執一遇大雨時行通倉即呈請總督御史京倉即呈請都統御史如有一人到倉即行開封及時察看修補後即時封固以謹防範餘月仍交倉場總督收存倘該監督等不即時察看滲漏致有浥爛等弊咎在總督一收糧上倉各省糧船到通正兌米於石壩交兌改兌米於土壩交兌坐糧廳察看米色呈總督倉場侍郎驗定起解上袋用駁船轉運正兌

米由石壩裏河經普濟平下平上慶豐四廩每
廩換船至

京城東便門外大通橋掣袋驗米應交太平倉者
仍水運應交內倉及裕豐儲濟東萬安倉者換
車陸運應交西萬安祿米南新舊太北新海運
富新興平本裕豐益各倉者水運至朝陽門外
換車陸運均分送各倉掣驗交收改兌米由土
壩裏河應交通州西倉者至新城南門外換車

應交通州中倉者至舊城南門外換車均陸運
至倉掣驗交收其石土兩壩起斛大通橋掣驗
京城朝陽門通州新舊二南門換車皆暫貯號房
石壩至京倉水運以經紀承領陸運以車戶承
領土壩至通倉水陸運皆車戶承領過壩過插
落厓上船皆雇夫負運白糧運送內倉及通倉
亦如之○順治初年定起卸漕糧遵照定例平
斛下攬禁止淋尖踢斛除每石給錢二十二文

外倘有多收情弊倉場侍郎訪實拏交刑部按律治罪仍刊置一單頒發各幫運官如運糧進倉不挨次序故為攙先那後抑勒索詐許據實填報從重懲處如運官捏填容隱事發一并題

叅○又定凡搭運無耗平米到壩起交

如搭運節省脚

米一項原繫耗米是以謂之無耗平米

石土兩壩槩以加二五紅

斛折算正數起運京通各倉給發脚價倉中仍照平斛收受入厰○起運德州倉糧改兌平粟

米到通

應運德州倉粟米改運到通亦繁無耗

如於石壩起斛照

例以加二五紅斛折算正數起運京倉給發脚

價如於土壩起斛照例以加一七紅斛折算正

數起運通倉給發脚價倉中仍照平斛米數收

受入厥○五年題準供用庫

今隸顏料庫

舊存紅斛

與通州鐵斛較掣紅斛甚大鐵斛甚小酌量將

紅斛減改永為斛式○十二年題準製造鐵斛

頒發倉場永遠遵行○十三年定京通各倉收

受漕米以坐派紅單

即印票

到日為始京倉定限

十日收完印給倉收移送坐糧廳轉發運弁寫

驗完呈通州倉限七日收完如過期不完不印

給倉收倉場侍郎察明題叅○十七年題準漕

糧抵通挨次收受令倉場刊置一單頒發運官

倘有需索陋規及分外加費者從重懲治如運

官捏填充隱事發一并題叅○康熙二十三年

題準白糧自本地包裹抵通過壩恐開包量兌

致有拋散向例用秤交兌應定限以正耗米一
百六十斤為一石米色不淨加重十斤令旗丁
赴倉親納短少賠補有餘給還○四十三年題
準各衙門發出倉糧均應照部頒鐵斛其坐糧
廳收兌漕糧進京倉者每石加耗二斗五升進
通倉者每石加耗一斗七升向用加二五加一
七紅斛連正耗米同收以省量算之煩應仍照
舊例○雍正二年題準經紀運米到橋車戶運

米進倉舊例每米五十袋抽掣一袋一袋短少
餘袋照數均賠於各役脚價內扣抵嗣後酌定
數目不許多欠經紀繫船運每十萬石定掣欠
二百石大通橋車戶繫陸運每十萬石定掣欠
二百五十石通倉車戶繫水陸並運每十萬石
亦定掣欠二百石每石秬米作價銀七錢稜米
六錢準於脚價內扣抵若此外再有多欠除不
準將脚價扣抵外仍照盜賣漕糧例治罪每秬

稔米一石作價銀一兩四錢交與地方官著落
家產變賠○四年題準白糧過壩坐糧廳每十
包稱驗一包以一百六十斤為一石如斤數不
足鈐印包上報倉場移知倉監督至該倉交收
之時倉場侍郎親詣倉內驗明過斛如有短少
責令運軍補足○又覆準石土兩壩堆貯糧袋
責令經紀車戶鋪墊席箔以防霉爛倘奉行不
力致有霉爛察出將布袋糧米勒令賠補並將

該役責革如倉場及御史不能察出一并交部
議處○又覆準漕糧卸載拋散米粒責令坐糧
廳率大通橋監督設法掃收存貯俟漕糧運竣
之日通計掃收數目由倉場侍郎具奏以為冬
月煮飯振貧之用○又奏準改兌稔米二十三
萬從前原貯通倉今通倉稔米數多廩座不敷
應令統進京倉○五年題準失風挂欠曬颺耗
米免其賠補其失風挂欠正米照數追補○六

年覆準各省交兌漕糧監兌官每船各兌一石
封貯鈐印到淮總督察驗加封抵通時倉場侍
郎率坐糧廳照樣驗對起卸倘有攙和等弊將
弁軍一并究處○又題準交收漕糧將杭稔粟
米配搭均勻令各倉輪流籤掣分撥○又議準
交兌白糧責令地方官將徵收樣米封貯運通
倉場照樣比對驗收○又題準內倉需用白米
次白米令各幫掣籤輪流運送○七年覆準內

倉交收白糧於弁軍投文之後照十日定期收
竣給發完呈詳報倉場察覈○又奏準各倉收
受漕糧舊例收竣之後開具揭帖呈送倉場侍
郎察覈嗣後增設連三編號印單於收米十日
內一送倉場侍郎一移坐糧廳一留倉存案其
各倉所送揭帖挨次編號填注經承姓名毋許
洗補倉場侍郎按照號數黏連鈐印以備稽察
○又覆準白糧交倉餘米照漕例顆粒不許出

倉先盡挂欠之弁軍買抵如無欠白弁軍照秬
米價直給發○又覆準漕糧抵壩令坐糧廳驗
明米色方許經紀車戶運送各倉交收○十二
年覆準京通各廩雍正七年以後之米準報氣
頭一二百石廩底三十五石惟裕豐儲濟兩倉
繫七年新建各廩米隨收隨放存貯未久止準
氣頭廩底數十石○乾隆元年奏準裕豐儲濟
二倉米有陳積六七年不等者準照京通各倉

之例報氣頭厥底惟儲濟倉內乾隆二年增建
之厥仍照數十石之例開報竝乾隆十二年後
照各倉一例辦理○又奏準漕糧到通由通運
京各插雇夫負運向多游手無藉之徒倚衆橫
行應令坐糧廳及大通橋監督協同地方官不
時稽察並取號頭不敢容留匪類甘結存案如
有不法等事號頭徇隱不報以及縱令遠颺者
並坐以罪該管各官不即拏究從重議處○三

年奏準通倉舊存稜米支存無幾不敷支故嗣後將改兌稜米每年撥貯通倉十三萬石其餘仍進京倉○又題準通州土壩車戶掣欠定例每運米十萬石掣欠止二百石者杭米每石七錢稜米每石六錢準其於腳價內扣抵若再有多欠每杭稜米一石扣銀一兩四錢著落家產追賠但每年掣欠數多扣追難償嗣後每石準其掣欠八合照七錢六錢之例買餘米抵補此

外若再多欠仍照一兩四錢之例於腳價內扣抵○又覆準向例內倉歲進白糧二萬餘石今禁城兵丁及內監人等白米改給秔米應改進漕糧萬五千石抵進白糧七千石其一應收受遞減曬颺折耗運軍餘米並收米之連單倉收完呈以及腳價茶果等項統照京通各倉之例○又奏準各倉收貯糧米向例每廩以萬一千六百石為額今各倉所貯之米或多或少且有奇

零尾數難以覈算應酌定每廩以紅斛正米萬石定為常額毋許盈縮如有零數別貯一廩○又覆準通倉抽掣米數如有書攢人等勾通經紀將掣欠之數以多報少折價侵肥者總督倉場侍郎察究○四年奏準通倉稻米不敷支發將應運京倉稜米二萬石改撥通州以抵不敷稻米○又奏準豐益倉向例每歲進米十五萬石今剩積數多應減半撥運每年減收腳價茶

果銀三百五十餘兩於坐糧廳衙門支取○七年議準內倉每年約放秬米二萬四五千石不等今倉場僅撥浙江各衛所額解紅斛秬米一萬五千石合平斛米一萬七千八百九十四石一斗每年不敷米五六千石至七八千石不等於額撥米數之外增撥紅斛秬米五千石以供支發○十七年覆準嗣後兌漕之際令稽察御史會同監督掣驗嚴禁胥役需索務期米色明

潔斛面平足如有賄囑濫收等弊即將監督叅處並令出軍統領多差幹役嚴行緝訪如有胥役舞弊即嚴拏治罪○又覆準各倉貯米每厰以正米萬石為常額毋許或多或少又新糧不得攙入舊米厰內進米時務令倉場總督分定厰座一面將陳厰封固俟進米完日與稽察御史親赴倉內丈算覈足開明所收米數並驗收監督經管吏攢姓名收貯年月標置厰門封固

注册報部

一發米出倉順治十六年覆準各倉發米時挨
次支領如有車輛擁擠及偷盜等事拏送刑部
治罪○又覆準各倉發米時不許在倉買賣倘
有串通倉役包攬糧米者拏送刑部從重治罪
○康熙元年覆準每季發米部差司官二人並
旗員一人到倉與監督一同監放有通同攬和
糠土濕米等弊倉場侍郎題叅一并議處若監

督不嚴察下役致有攙和糠土濕米並少糧索
錢等弊將經管官交與吏部從重議處作弊下
役交與刑部從重治罪至領運米之佐領領催
並家人若將好米攙和糠土偷盜者亦送刑部
從重治罪○又奏準八旗俸餉及上三旗米冊
每季限上月初十日以內送部轉咨倉場照例
兩月內支發全完如每季上月初十日以內米
冊不送部該旗即將造冊遲延之官題叅交部

議處○又議準官兵俸餉米既已造入冊內雖有升轉不許增補告休物故者停其裁扣仍給原人其頂補之人於下月支給如獲罪革退者仍行裁扣○雍正元年奉

旨將八旗米冊送部各日期記明奏聞其舛錯駁回者從再送冊之日扣算○又覆準鄉會場供給米內倉應用米滿漢廩糧兵丁行糧禮部支取內監食米光祿寺飼蠶米象房飼象米及散給囚糧內

管領下口糧均支老米其五城振貧兵部箭匠
工部作管織染局匠役等食米均支稜米○又
奏準俸米兵餉舊例春秋二季關支限三月發
完將兵米分作三季俸米分作兩季限兩月發
完○二年奏準上駟院及各王府飼馬鹿羸等
處米舊例繫各倉監督運送嗣後覈定應給米
數由部劄知各倉別給印票付領米官役持票
赴倉支領各倉監督察對米數相符照數支給

不必著令監督頭役押送如有需索加米等情
許該監督揭報題叅○三年奏準八旗兵米向
例分京內八倉支領今增設萬安一倉將護軍
校驍騎校應領米別分一倉同八旗兵米分作
九處支給○五年奏準內倉存貯芝麻因取用
甚少恐久貯變色嗣後每年所收芝麻百石除
各處支發外將餘剩芝麻過三年後照例變價
交庫○六年奏準各倉設立循環二簿舊例止

記糧米收發數目嗣後將支發糶賣之數按照部咨及五城司坊官通州知州各印簿逐一磨對勿許舛錯○七年

諭支發兵米之時如遇雨水稍多即寬限一月永為定例欽此○又奏準漕米貯倉向例按年挨陳支放凡有交受零數新米各貯一處不許入於舊米之內將放過米數並經手監督攢典姓名於某年月日收貯開明黏貼殿門仍於循環簿內注明

報部嗣後拱陳應發之數並令掣籤開發倘不
掣籤致家人開放新數者事發照知縣失察家
人犯贓例叅處○又覆準各倉鋪設供給不得
絲毫索派倉役違者計贓科罪其監看放米旗
員日用均令自備倘與倉役勾通需索領米之
人叅革計贓科罪監督任聽倉役需索不察拏
者照州縣失察衙役犯贓例議處○又覆準八
旗官員支領俸米每一佐領給票一張倉場驗

明給發○又覆準守衛

圓明園八旗官軍俸米月米東四旗於本裕倉西
四旗於豐益倉支領○八年奏準新增裕豐儲
濟二倉將護軍校驍騎校米仍隨八旗支領其
鑲黃正黃正白等三旗米別為三分同八旗甲
米分十一倉闡發仍將所限各倉及支發米數
開列厰名年分五日一報○九年覆準八旗支
領米冊於各佐領總數下覈算兵米分注杭稜

粟米各若干俸米分注白粳稜粟米各若干送部轉行各倉按色給發○乾隆元年奏準監督失察攢典涵領倉米希圖多賣價者照府州縣書役侵欺錢糧不行察出例以徇情論降二級留任○二年奏準兵米分為四季於二五八十一等月支給或遇有閏之年或值米價昂貴後季米不能接濟前季或南米抵通需屢盛貯隨時奏準酌定先期開支○又奏準向例太常寺

光祿寺及會同四譯館需用白糧二千餘石王
公百官俸白米十五六萬石內務府

禁城兵丁及內監食用等項需白糧萬石今白糧
減徵應將王公百官白糧酌減一半以秬米抵
給

禁城兵丁及內監白糧全改秬米禮部支領各國
貢使及太常寺光祿寺支領祭祀等項白糧內
務府元宵糯米理藩院所領扎薩克王貝勒貝

子公台吉各來使公主郡主額駙等白糧均照
舊支給欽天監太醫院月糧宗學讀書宗室八
旗讀書覺羅左右兩翼教習

盛京吉林寧古塔索倫八旗厄魯特等處送物來
京人員

欽安殿道士內監各處番僧以及匠役口糧全改
杭米薊易二州每年截留白糧米亦減半以杭
米抵給○三年奏準黑豆質堅多繫隨收隨發

並無消耗遞減之數不準開銷○又奏準旗人領得粟米糶賣不得過銀五六錢今米價昂貴應將兵米內借撥代粟稔米十八萬石交五城十廠平糶所賣之錢易銀解部將來兵丁應支粟米內酌量豐收之年於秋冬二季每石折銀八錢陸續分年扣還○又題準八旗兵丁四季領米每季均有零尾抄勺佐領總領分給每多折耗應將每年春夏秋三季所領三色米總數

以斗為止散數以升合為止其抄勺零數歸入
第四季支領○又奏準

禁城兵丁及內監應支白糧改給秔米有折耗碾
碓之費按原給白米一石改給秔米一石二斗
五升○又議準每季領米時旗員察驗米質如
果不堪食用令於倉中封固即報倉場侍郎都
統察明具奏○又奏準倉場侍郎於進米時分
定廩名將陳廩封固進米完日赴倉將新米丈

算覈足更換封條如進米之際適逢發米之期該監督將挨陳應發之數開報倉場侍郎委官拆封監看倘有不遵挨陳發給者將監督題叅倉役究治○又奏準每年春秋二季支發俸米多有在通售賣者以致米局舖商賄托倉役有撞斛多量之弊應令倉場侍郎於發米時嚴行訪察如有前弊拏送刑部治罪倘察拏不力別經發覺交部嚴加議處○又奏準每倉造具鐵

斛一張作為樣斛各旗委放米之員以木斛較對樣斛兌發以木攬打平嚴禁簸箕歪量之弊○又奏準修造斗斛均令呈報倉場侍郎較準記烙火印倘有不呈報較對烙印即行私用者題叅究治○四年奏準開倉時每旗委押旗叅領於發米前一日將應領米數及領米人數開單交與監督按數起票三張於領米後一日一交滿監督一交漢監督一交監放監督稽察出

倉其領米兵丁花名各旗開單鈐用佐領圖記帶赴倉內交與押旗叅領點驗進倉仍令嚴行稽察如監督所屬人等作弊押旗叅領察出呈該管都統叅奏究處押旗叅領所屬人等作弊監督察出呈倉場侍郎叅奏究處至米車出倉除叅領與監督等一同察對紅簿外其閒散駢騎校等仍在倉門巡察令米車挨次排行嚴禁爭擠○又奏準向例官俸米內有粟米一項以

採買直隸營田稻米抵支但直屬或遇歉收停止採買即不敷支發應以稔米抵稻米支給如直屬稻米豐收採買運通仍支稻米○又奏準各衙門筆帖式俸米向例在通倉關支但所領米數無多赴通有往還腳費著改於京倉給領○五年奏準各倉木斛三年一次建造於解通板木內取用工匠鐵葉每張給銀七錢於通濟庫銀內支用○八年奏準八旗官兵馬駝應需

料豆從前原繫給銀採買但近京地方產豆無幾每多闕乏應於河南山東二省粟米內改徵黑豆撥運京倉於每年九月馬駝回場每匹月給黑豆一石以資芻秣至次年四月出場之日停止○又奏準恭遇

巡幸之年各旗馬駝留養

京師自四月以後仍酌量支給本色黑豆其豆價照例扣除○又題準改鑄小口鐵斛頒發倉場

並有漕各省照式鑄造遵用舊存鐵斛繳銷○
十年奏準八旗關支馬豆向未酌定送冊限期
以致遲早不一兵丁不得及時支領嗣後每月
定於初十日以內支給於前月之杪造冊送部
劄倉如限內冊不送部照造冊遲延例議處○
十二年奏準八旗官員俸米總以十二月十五
日六月十五日兵丁米總以上月十五日作為
過冊定限各旗送冊或因遲速不齊或因舛錯

駁回校正以致逾限總以月之十五日為準分
別關支裁扣如官兵升轉在定限以前準其支
領新任俸餉在定限以後不準支領新任俸餉
其告休物故在定限以後準其支領銀米在定
限以前不準支領銀米其開倉發米總以每季
孟月初一日作為定限如官兵降革在每季初
一日以前其米槩行追繳如在初一日以後者
免追至各旗兵丁逃亡將應交米折銀暫存旗

庫於次年三月彙總交納○十七年

諭向來八旗兵米皆按四季支發但發完之後因去
下屆發米之期尚遠舖戶得以乘機囤積米價日
漸昂貴若將兵米陸續支發俾源源接續殊有裨
益但就一季之中再為分次支發未免紛繁其應
如何酌分旗分按月輪發著妥議具奏欽此遵

旨議準兵米既按月輪發應分別旗分將鑲黃正黃
二旗分於四孟月正白正紅鑲白三旗分於四

仲月鑲紅正藍鑲藍三旗分於四季月各旗依酌定月分赴領則辦理不致紛繁米糧時得接濟於兵民均有裨益○又覆準各倉發米時滿漢監督皆在官廳檢閱米冊從不親至廩口一任家人倉役在廩支發易滋弊端嗣後務令一人在廩口監看倘仍前偷安巡漕御史即行糾叅○又奏準向來各倉整廩繫倉場總督封識其發過殘廩即交該倉監督自封自開嗣後凡

繫殘廩皆由都統御史封識發米之時驗封啟
鑰○又奏準各倉廩米務令挨陳開發報部察
覈如王公等所差領米之人揀擇新廩許監督
稟報倉場侍郎及御史指名叅奏交部治罪監
督如違成例越廩支發一并叅處○又覆準京
通倉支發各旗米向繫旗人自行載運乃希省
脚費並圖簡便賣於官局則官局於各旗領完
後赴倉支領賣於民局則總票中分出小票自

行支領其故不過串通書役花戶甲斗人等揀
擇好米斛面滿足遂致倉儲有闕無盈嗣後監
督發米務照總票數目令該旗全運出倉聽其
自行售賣倘領催及領米之人仍前舞弊聽稽
察御史指名題叅將該領催等從重治罪並曉
諭官民米局如有於總票中私分小票或於封
倉後私赴支領者經步軍統領等衙門察出將
賣米之人無論王公大臣官員皆即指名題叅

其倉役及賣米人等照偷盜例究處所賣之米全數留倉○又奏準京倉米雖屬挨陳支領但每季兵米各倉均開厰支發而新漕運京又須分派兌收是一倉之中有新有舊有發有收牽溷不清錯雜難覈應將京倉八旗兵米及官俸役食等米每月止開一倉先盡一倉發完再開一倉以次關支其空出之厰挨次收貯新漕俟各倉支發全完之後仍照收漕先後挨陳發米

再京倉既定先盡一倉以次支發則見在發米之倉即應委官稽察其餘各倉無庸各差御史一人應以本年為始每年差滿漢御史二人專察京倉凡遇收發之時該監督先期知會該御史等輪流稽察監看倘有違例出入等弊將該監督題叅治罪

一隨糧耗米各省正兌漕糧抵通每石耗米二斗五升進倉時每正米一石收倉耗七升尖米

四升二合又尖上加耗米二合九勺四抄又節
省盤牖耗米三升內除尖米四升二合作三年
遞減外仍存三項米一斗二合九勺四抄均作
正開銷其餘一斗五合六抄米內五牖盤運折
耗米二升曬颺折耗米四升七合六抄給運軍
回船食米三升八合改兌漕糧抵通每石耗米
一斗七升進倉時每正米一石收耗米四升尖
米四升二合又尖上加耗米一合六勺八抄以

上三項米內除尖米四升二合作三年遞減外
仍存二項米四升一合六勺八抄均作正開銷
其餘米八升六合三勺二抄內曬颺折耗米四
升八合給運軍回船食米三升八合○順治十
六年覆準京通各倉所收漕米不及一月者不
準遞減一月之外每石每月於尖米內遞減折
耗米一合一勺六抄以三十六月為止此外不
準遞減至內倉白粳米糯米如耗米四升九合

九勺七抄八撮八圭者每石每月準遞減二合
七勺七抄七撮七圭如耗米二升九合九勺九
抄八撮八圭者每石每月準減米八勺三抄二
撮三圭通州倉白秔米糯米每石每月準遞減
二合八勺三撮三圭糙秔米每石每月準遞減
三合七勺七撮餘均作正支發各倉收貯黑豆
照米例遞減○雍正五年題準交收漕米停止
曬颺將原備折耗米四升七合六抄令各監督

於漕米進倉之時抽掣一二袋驗看如有潮濕計其折耗將未驗看之米照此計算餘剩之米歸入正項支銷

一隨漕經費各省解至通濟庫交納每年糧船抵通交兌按船按米給簷夫羨餘銀有差

詳見漕運

則其運京運通水陸運費過壩過牘負運腳價

各有成例按數支發○順治初年定土石兩壩起運京通各倉漕米內除失風漂流米扣除不

給脚價外凡實起過壩進倉糧米均按石覈給
脚價○十年題準石壩經紀自壩由裏河五牘
駁運至大通橋每糧一石給脚價二分四釐○
又覆準普濟平下平上慶豐等四牘負運漕米
過牘每牘每石給脚價三釐大通橋負運漕米
落厓堆貯號房每石亦給脚價三釐○又覆準
白糧經紀於石壩裏河負運白糧上船每石給
脚價三釐五毫○又覆準白糧經紀由石壩裏

河五牘駁運白糧至大通橋每石給腳價一分
八釐○又議準普濟平下平上慶豐四牘負運
白糧過牘每石共給腳價八釐七毫三絲七忽
六微○又覆準大通橋負運白糧落厓堆貯號
房每石給腳價二釐一毫八絲四忽四微○又
覆準白糧經紀土壩裏河負運白糧上船每石
給腳價三釐五毫○康熙三十九年覆準漕糧
抵石土二壩向由外河船戶負米落厓堆貯號

房每石各給腳價三釐今外河船戶裁革歸并
經紀每石給銀一釐由土壩裏河負米上船撥
運至新舊兩城南門號房裝車陸運進通州倉
每石各給車戶銀二分九釐○又題準白糧抵
石土兩壩向由外河船戶負運落厓每石給銀
二釐五毫今外河船戶裁革歸并白糧經紀每
石給銀一釐○四十一年覆準大通橋車戶運
米進祿米南新舊大海運北新富新興平等倉

每石給脚價四分九毫○四十四年題準白糧
經紀由土壩裏河駁運白糧至新舊兩城南門
落屋車運進通州倉每石共給脚價一分○又
覆準通州倉運送白米並紫老米至內務府倉
戶部內倉每石給車價六分○雍正五年覆準
漕糧於石壩起斛之後向用水脚由號房負運
上船今石壩裏河水脚裁革歸并軍糧經紀每
石給銀一釐○十二年覆準大通橋車戶運米

進祿米南新舊太海運北新富新興平等倉每
石給脚價三分四釐運進太平倉每石給脚價
一分五釐運進萬安倉每石給脚價二分五釐
九毫運進裕豐倉每石給脚價二分二釐運進
儲濟倉每石給脚價二分六釐運進豐益倉每
石給脚價一錢二分四釐○又覆準運進本裕
倉由石壩裏河五牘駁運至大通橋轉交車戶
起車陸運每石給經紀石壩外河負米落厓脚

價一釐裏河負米上船脚價一釐五插撥運至
大通橋脚價二分四釐普濟平下平上慶豐四
插水脚負運過插上船共銀一分二釐大通橋
水脚負米落厓堆貯號房脚價三釐大通橋車
戶陸運至倉每石給脚價九分四釐以上每石
共給銀一錢三分五釐○又題準京通各倉收
糧舊例雇夫負米入厓包圍名曰雇長每石給
銀八釐負米到圍名曰小甲每石給銀四釐鋪

廠打捲抱籌臺斛京倉名花戶通倉名甲斗每石給銀七毫共給銀一分二釐七毫今每項減半實給銀六釐三毫五絲其本裕一倉每年進米無多仍照舊例發給○又題準大通橋車戶運送白糧進內倉每石給銀二分八釐○十三年覆準在京各倉運送廣惠局米每石給車價銀三分五釐○乾隆三年奏準山東河南二省運到黑豆自通至京入廠每石給負運腳價一

分七釐車運銀五分八釐倉役脚價六釐三毫
每豆二石給席價銀一釐七毫○又題準通州
倉向有白糧飯銀及變賣麻袋銀二項給監督
作為用度今監督既給養廉其飯銀裁交通庫
以充開放白糧並一應辦公之用○四年題準
大通橋車戶向例運米萬石扣銀千六百二十
五兩以作買餘抵補掣欠如有餘剩并入節省
歸公今應將車戶扣除銀除買補掣欠之外餘

剗給還免其歸公○七年議準凡京倉運送內
務府米糧向不開銷脚價今議定每石準給脚
價三分五釐○八年覆準漕糧抵通運進京倉
於普濟等四牐及大通橋各設水脚頭役負運
上船每石給銀二釐七毫○十三年覆準豫省
漕糧改徵小麥最易潮濕生蟲不便散貯屢中
應令席繩紮固封固收藏所需席繩等銀於通
濟庫給發

一北河濬淺乾隆十一年議準各省漕船抵天津遇淺起駁向於漕糧項下編徵銀一萬四千五百餘兩解交通濟庫發給運軍

詳見漕運則例嗣後

應於北河六汛增造堡船六十召募祿夫百八十名長設淺夫三百名每月各給工食銀一兩二錢令沿河汛升上下游巡督率祿夫淺夫隨時疏濬其造船及置備器具並夫役工食皆於通濟庫收貯駁船銀內動支如有餘剩仍照數

派給運軍以為駁淺之用

一駁船運袋石壩裏河軍糧經紀運米駁船百
隻石壩二十四隻普濟牘二十隻平下牘十有
五隻平上牘二十二隻慶豐牘十有九隻白糧
經紀運米駁船二十五隻分撥五牘各五隻土
壩裏河車戶運漕白糧駁船二十隻均十年修
造一次每船給銀七十八兩一錢三分○順治
十三年題準成造駁船每船給價銀二百九十

八兩三錢九分六釐在通濟庫給發○康熙六年題準每年各役豫請支給脚價自行修艚於各役脚價內限六年勻扣還庫又土壩裏河白糧經紀自備駁船五隻不請支造船銀○三十七年題準大通橋至朝陽門護城河駁船二十八隻朝陽門至東直門護城河駁船十有四隻定限十年一造每船給修造銀一百八十六兩六錢六分於車戶脚價銀內六年勻扣還庫○

三十九年議準石土兩壩外河向設有白糧船
戶三十五名共駁船七十隻內石壩四十隻土
壩三十隻每船給船價銀百四十兩今負運落
厓事務歸并白糧經紀土壩車戶經營或租或
買繫自行備用毋庸支給價銀○四十七年題
準朝陽門至東直門護城河駁船十有四隻撥
給會清河駁運本裕倉漕米○雍正二年奏準
石壩需用米袋向於糧船未到之先照依時價

發銀令軍糧經紀自置袋十有五萬條白糧經紀自置袋萬條其支過袋價仍於各役本年腳價內照數扣除還庫嗣後每歲動茶果銀增製官袋四萬條○三年題準本裕倉漕糧改為陸運其朝陽門撥給會清河駁船一并裁革○四年題準萬安倉開設東門疏濬護城河將舊設駁船改小仍給八船料價改造十四船撥運在於各役腳價內分八年扣還○又奏準前增置

米袋四萬條用殘將袋變價仍歸茶果項下以
為次年置袋之用○又覆準土壩車戶每年共
置布袋四萬條今改兌稜米全進京倉土壩車
戶脚價無多在於石壩官置袋內通融借給一
二萬條運竣仍還石壩應用○八年題準萬安
倉運道鋪墊石路仍改車運將前項駁船移於
朝陽門外濟運○乾隆元年奏準通濟庫奏繳
餘剩銀嗣後酌留二萬二千四百餘兩置買次

年新漕米袋如有餘剩悉行解部○三年奏準
內倉改進漕糧應需運米布袋在於通漕借用
○五年奏準漕糧到通由五牘轉運進京例由
經紀置造駁船往回駁運各有代役一名名曰
船頭向繫經紀自雇聚散自由不聽約束嗣後
即令通州及大興縣各按所屬地方召募殷實
良民承充五牘共船頭一百二十五名每名每
年於經紀腳價銀內扣給工食銀三十五兩○

七年奏準五插船頭偷盜米糧計所偷米數以
監守自盜論為數無多罪止杖懲者枷責完結
其犯徒罪以上計贓照律治罪○又題準大通
橋至朝陽門護城河駁船二十八隻原定造船
價銀每船一百八十六兩六錢內有贏餘嗣後
每船給銀一百三十兩○十三年奏準石土兩
壩每年起運漕糧經紀車戶等已置米袋十六
七萬條每日轉運週而復始足以敷用其每年

增置米袋四萬條停其置造以省浮費倘不敷
運轉令照例自行置備

一採買糶賣康熙四十年議準各倉久貯米糧
遇有附近地方米價騰貴挨陳發往平糶仍照
糶價依限交部○雍正六年

諭直隸地方新營水利開墾稻田產米甚多直隸百姓
不慣食稻米發帑採買利益民間將所買稻米運交
通倉以抵粟米支放欽此○八年覆準五城設廠發

糶成色米委部院衙門官各一人協同地方官

監糶止許零星糶賣以防囤積仍將所收銀錢

按月造冊送部察覈○又奏準五城領賣通倉

米每石脚價七分

自倉用小車推出裝載大車脚價一分二釐米到廠扛夫

銀一釐賃用布袋銀四釐均按石給發具大車價銀五分領米人後飯食銀三釐○又

覆準五城領賣通倉米向例自通至京程塗四

十里計程覈給脚價其運送四鄉八廠出糶應

照例按程覈給○九年題準各倉發糶十成老

米每石作價一兩稜米八錢粟米六錢成色米
每石照十成米色按成遞減五分其盤量虧折
由京倉領糶每石準銷耗米一升由通倉領糶
每石準銷耗米二升○十年奏準直隸州縣採
買稻米運通竟有不從本地辦買足數將通州
支放之米私買抵兌攙雜交收之弊應令州縣
在本地採買者該地方官盤驗豫將盤過實數
速報倉場存案仍封貯米樣上鈐印信隨船呈

驗倘有虧折短少不得在通買補照漕糧例於
次年搭運交倉○又奏準

京城各局廠領運京倉米每石給脚價制錢三十
五文本裕倉每石給制錢七十文通州二廠領
運通倉米每石給制錢二十文解錢車價每串
四文○十一年奏準各倉變色米按成估報酌
減糶賣○又奏準五城領運通倉米每石定脚
價七分其米錢解運部庫及一應席片紙張等

費每糶米萬石準銷銀三十兩○乾隆二年奉
旨撥米五城各廠平糶○又奏準於近京東西南北
四鄉增設八廠撥米平糶以濟民食每廠書吏
二名斗級八名夫役四名令地方官撥給工食
每官從役三名共給銀五錢夫役每名日給銀
六分書吏每名日給銀八分以為日用之費各
倉運米到廠令倉場及順天府撥車運送發糶
米每石準折耗二升糶價銀錢兼收十日一次

解部○三年奉

旨八旗牧養馬駝黑豆在所必需今戶部因倉貯豆
少請每月減半支放朕念兵丁等若自行增買不
免多費且在京收買恐市價益復高昂今年山東
河南二省收成尚好應於山東採買五萬石河南
採買三萬石共八萬石足敷支放之用著該部行
文山東河南二省巡撫酌量地方情形動支正項
錢糧分令各州縣採買嚴禁短價病民及胥役侵

蝕等弊務須於河凍之先委官運送抵通勿致有
誤臘月以後支放之用其豆價並腳價等項仍造
冊報部覈銷欽此○六年奏準各倉發糶氣頭廠
底米向繫各監督直檄五城領糶並不移會御
史嗣後令各倉監督將米數移會五城御史酌
委司坊官領糶○又奏準五城十廠並通州糶
賣各倉氣頭廠底米定例每月之一日六日投
批逢月之五日十日交錢嗣後每廠頒發循環

簿二本令其逐日登填糶賣米數錢數並實存
米數按月送部換給仍以一六投批五十交錢
無論多寡盡數交納倉場侍郎於部檄發糶支
到之日就各廠近地將倉米按十一分均分令
各廠領糶如一倉米多即分兩廠米少一廠并
領二倉本裕倉米酌令北城領糶通州米除通
廠支領外勻給東南二城○七年題準五城糶
米錢年終報銷務以十二月三十日為止截定

數目造報庶免舛錯察覈亦易清楚再次年開
印日起定限兩月彙齊送部如有遲延照例叅
處○八年題準古北喜峯等口如果收成豐稔
米多價賤奏明動藩庫銀委官按時採買以四
萬七千餘石運交薊遵等倉供應

陵寢支放餘均運通收貯其豫東二省應運

陵糈之四萬七千餘石仍運通倉備用○九年奏準京
通各倉每季支領俸米兵餉均有氣頭嚴底向

例隨報隨發各城按成減價發糶嗣後每年分作兩次京倉夏秋二季並通倉春季留於十月以後發糶京倉冬春二季通倉秋季留在三四月間發糶○十年題準豫省祥符等九縣採買黑豆四萬石運至通倉連運價雜費每石合銀九錢一分二釐三毫由通運京脚費計程四十里每石加車價銀五分二釐統計價費在一兩以內應統限十一月內辦起務於來春三月全

數抵通自通運京兌交倉場侍郎代收轉運需用布袋等項就近借撥

一京通官役公費倉場滿漢侍郎每年各給銀

二千四百兩

舊例千四百兩雍正六年加給十兩

坐糧廳滿漢二

人每年各給銀二千二百兩

舊例千二百兩雍正六年加給十兩

入通濟庫餘平分給銀多寡不等

均於茶果銀內動支大通橋

滿漢監督每年各給銀五百兩倉場衙門筆帖

式四人每年共給銀千八百兩○雍正元年議

準坐糧廳茶果銀漕白二糧每船納銀十兩小
米每船納銀七兩除各幫頭及有事故船不納
外按到通船實數交納多寡無定如全漕抵通
約收銀六萬餘兩以為各官公費吏役飯食苦
蓋

黃船疏濬塢河修理牯壩及催漕快船收買各幫
交剩餘米豆價等項之用○四年奏準各倉茶
果銀每米一廩納銀六十兩七分作放米修廩

之用三分給吏役以備造冊刷卷等費仍令坐糧廳徵收其不足一敷者按米遞減封貯通濟庫俟驗明各倉放米數目開報倉場照數批給永為定例○七年奏準白糧進倉向例每船各項需銀三十五六兩嗣後將各船陋規銀裁減十分之六存四分為雇募倉役之用其漕船抵通每起米一石運軍貼經紀車戶制錢二十二文每大米一石經紀貼大通橋各役制錢一文

小米二石亦貼制錢一文至漕糧運進京倉每
大米一石小米二石大通橋車戶貼倉役亦如
之其倉場並坐糧廳衙門各書役舊有飯銀酌
量存留餘悉裁革○八年奏準將應存應革各
款均勒石昭示以杜額外需索之弊○十三年
定通濟庫大使一人每年給銀二百兩庫吏一
名給工食銀百二十兩庫役四名共給工食銀
六十兩均於茶果銀內動支○又奏準各倉脚

價每領銀百兩向給倉場書吏紙筆飯食銀八兩應行裁革別於茶果銀內按各倉應領腳價數目酌量撥給○乾隆三年奏準京通十五倉滿漢監督每年各給銀三百兩於坐糧廳茶果項下動支○又奏準內倉向收白糧茶果銀一千六百餘兩以為監督筆帖式吏役飯食一應雜費之用今白糧議減改進漕糧所收茶果等銀僅六百餘兩不敷支給每年撥給運米口袋

萬條聽該倉變價應用○九年奏準各省糧船到通應交茶果銀向繫運軍自行交納往往交不足數除山東河南二省糧船不過淮仍照舊交納外其各省皆令糧道於各軍應領耗贈項內每船扣茶果銀十兩封交押運廳官到通覈算批解坐糧廳衙門交納如遇中塗截留仍行散給運軍以為起米回空之費○十三年奏準向因內倉應得腳價茶果等銀不敷辦公將每

年殘袋準給萬條令其變價以資公用今官袋
既停製造應於坐糧廳茶果銀內照殘袋變銀
八百兩之數給發以為辦公之用

一直省州縣衛所各設常平倉凡米麥穀豆高
梁咸貯該管官司其出納歲歉振借平糶年豐
出陳易新計一歲之出入造具奏銷冊籍申府
司達督撫彙造送部察覈○直隸江南福建各
設倉大使二人山東五人山西三人江西浙江

各一人西安四人廣東八人其餘直省府州縣
衛所均有倉無額設大使○順治十三年議準
積穀振濟務令修葺倉廩印烙倉斛選擇倉書
糴糶平價不許別項動支倉穀○康熙二十五
年題準黑龍江默爾根地方起造倉廩收貯米
穀○雍正四年覆準凡地方倉廩有滲漏及牆
垣木植不堅全者所需工費無多該地方官即
為修補若年久傾圮甃瓦木植破碎朽壞者該

地方官即詳明上司委官估計工費報部即動支正項修蓋其有地方廩座無多將倉糧寄貯僧寺道院者或並無寄貯之處將米穀露囤者該地方官即詳請督撫察勘確實將作何建倉之處酌量具題倘州縣官漫不經心因循怠玩不修補倉廩不詳請修蓋以致米穀霉爛者照溺職例革職限一年內照動帑買補之數賠完如限內不完即照侵蝕錢糧例以未完米穀之

數依律治罪倉廩既經修造猶有托名霉爛虧空者察出即照侵蝕例治罪○六年

諭積貯米穀所以備旱澇緩急之需民命攸關若倉廩不足必有霉爛虧折等弊嗣後著將各府州縣倉廩入於交盤項內新舊交代若有傾圮滲漏及木植朽壞之處著接任官即行揭報不準接受倘有徇情濫受者即繫接任官之責除照例處分外仍令賠修欽此遵

此遵

旨議準各府州縣倉廩入於交盤項內交代如有傾圮
滲漏著接任官揭報將前任官照例議處賠修
如接任官徇情濫受即將接任官議處責令賠
修其霉爛虧空米穀著接任官限年賠完若接
任官藉端勒索亦即題叅○十一年議準喜峯
口倉就近歸於遷安縣經營每間貯穀五百四
十石計算應建倉廩二十六間○乾隆四年議
準興建倉廩準於存公銀內動給照例每間給

銀二十兩貯米五百石

一直省義倉社倉春則支借秋成還倉設正副社長司其出納每歲報該管地方官察覈

一直省地方水陸通衢設倉以備緩急其所貯米穀或供兵糈或佐常平計出納之數歲終彙入倉糧奏銷冊內申報督撫送部察覈

一直省營倉提鎮協駐劄之地及凡屬沿邊沿海及離省遙遠者皆設倉貯穀以備軍士借糶

委營弁經理

以上均詳見
積貯則例



欽定大清會典則例卷三十九